



Ilis edifizis principals da la «Alma Mater Friburgiensis», l'Universitad da Friburg.

MAD

# Universitad da Friburg – bilingua e d'irradiaziun internaziunala

Cun pli che 10 000 studentas e students

■ (anr/gc) L'Universitad da Friburg è ina scol'auta bilingua da muntada naziunala e d'irradiaziun internaziunala. Ella ha inizià 2018 il process per la strategia 2030. I va – tenor la rectora Astrid Epiney – per realisar quai ch'è da far per avair success en l'avegnir.

La reputaziun da l'Universitad da Friburg sa basa davent da l'entschatta sin in project ambizius da las elites catolicas da la Svizra. Ella è sa consolidada durant 130 onns dapi sia fundaziun (1889) en plirs regards sco instituziun da furmaziun e perscrutaziun. Ina posiziun speziala ha ella acquistà en la publicitad sin ils champs da la teologia e giurispudenza.

Fin oz han quatter caracteristicums distinguì l'Universitad da Friburg. Latiers s'audan: la bilinguitad, far punts sur il «Röstigraben», offrir studis interdisciplinars e porscher furmaziun sin il sector etc. – In'universitad vegn purtada da sia abilitad dad offrir en perscrutaziun ed instrucziun sco era concernent administraziun ed infrastruttura prestaziuns d'auta qualitat – e quai permanentamain e fidadamain. Sin quai sa basa era la reputaziun da l'Universitad da Friburg.

Uschia ha l'universitad creà ina nova professura per las ciencias ambientalas. I sa tracta d'in rom tranter etica, dretg, geografia ed ecologia politica che duai pussibilitar da dumagnar ils problems cun l'ambient en l'avegnir. La finamira è da realisar in ambient uman. Questa professura vegn confanziada cun daners ord l'unfrenda per l'Universitad da Fri-



Duas anteriuras absolventas da l'Universitad da Friburg: Cuss. fed. Karin Keller-Sutter e Viola Amherd mettan giu lur engriment.

MAD

burg che vegn prendida si onn per onn l'emprima dumengia d'advent.

## Renumads anteriurs absolvents

A l'Universitad da Friburg èn pli che 10 000 students s'immatriculads: 6000 dad els èn dunnas, ch'èn pia cleramain en la maioritad, e 4000 umens. Ils pli blers èn s'inscrits en la facultad filosofica (4600), suandads da la facultad da matematica, ciencias natiralas e medischina (2000) e la facultad giuridica (1600). L'onni passà èn vegnids acquistads en tut pli che 2300 titels e diploms (bachelor, master e doctorat).

Igl è cler che l'universitad è loscha da la gronda carriera d'antierurs, oz uschenunads alumns ed alumnas. Uschia han omaduas novas cusseglieras federalas studiegia a Friburg: cuss. fed. Karin Keller-Sutter ha fatg in postdiplom en pedagogia e cuss. fed. Viola Amherd ha frequentà la facultad da giurisprudenza e concludì sco giurista. La facultad per ciencias economicas e socialas han t.a. gi frequentà: a. cuss. fed. Joseph Deiss, era stà parsura da l'Assamblea generala da l'UNO, Klaus Schwab, fundatur e directur dal Forum economic mundial a Tavau e l'enconuschenta moderatura da televisiun ed interprendidra Christa Rigozzi.